

次說懈怠過。不能常精進。念處退失。不成就心慧故。依譬喻顯示應知。如經。若行者之心數數懈廢。如是等故。

次懈怠中。念處謂四念處。觀身不淨。觀受是苦。觀心無常。觀法無我。或可凡所受法。三學八正等。隨所修行。皆名念處。言退失者。釋經數數廢也。鑽木取火。一勢乃得。未熱而息。喻念處退。火難可得。喻不成心慧。

△^{戊五}不忘念功德二。^{己二}標章。^{己二}舉經。^{己三}釋義。

今初

次說第五。大人不忘念功德。

△^{己二}舉經。

經曰。汝等比丘。求善知識。求善護助。無如不忘念。若有不忘念者。諸煩惱賊則不能入。是故汝等。常當攝念在心。若失念者。則失諸功德。若念力堅強。雖入五欲賊中。不為所害。譬如著鎧入陣。則無所畏。是名不忘念。

△^{己三}釋義二。^{庚一}總示。^{庚二}列釋。

今初

論曰。第五。大人不忘念功德者。示現是一切行上首故。能破無始重怨故。

第五功德總示中。不忘念謂攝散歸一。常守不失。縱隨境起。常自知覺故。示現等者。標示下文如釋可見。

△^{庚二}列釋四。^{辛一}顯行勝。^{辛二}明遮惡。^{辛三}示勸修。^{辛四}明成多功德。今初

於中一切行者。略說三種。一者求聞法行。如經。汝等比丘。求善知識故。二者內善思惟行。如經。求善護故。三者如法修行。如經。求善助故。復示此等行中。為首為勝故。如經。無如不忘念故。

列釋中初科。略說三者。即聞思修。攝盡餘行。初求知識。對聞法者。從師聞故。善護對思惟者。不忘失故。善助對修行者。以資成故。此云三行。亦名三慧。行據作為。慧取明了。復下推勝。明不忘念。出過三行故。為首約次第。為勝據功強。

△^{辛二}明遮惡。

能遮無始重怨。不害三種善根故。如經。若有不忘念者。諸煩惱賊則不能入故。煩惱者。示心中惑亂故。賊者。從外集生過故。

二中無始重怨。即煩惱賊。三善根。即無貪等。善根力強。怨不能害。故云不能入也。下文牒

釋。煩惱是惑。故云心中。賊即喻業。故云外集。

△辛三示勸修。

復示勸修。令初後念成就。示現遮無始終心故。如經。是故汝等。常當攝念在心故。無始終故。失念成就多過故。如經。若失念者。則失諸功德故。

三中初念處成就者。謂未臨事前。釋經常攝。南山云。先嚴淨識。託對五塵是也。有作。四念處中初念處。非。

無始心有二。一者曩劫流浪。杳然無窮。二者即今妄緣。瞥爾不覺。文令攝心。乃當現起。攝念在心。念從心起。還攝歸心。使無馳散。無始終矣。謂不攝者。不知起滅故。無始終即忘念也。成就多過。謂煩惱賊害三善。即失功德也。

△辛四明成多功德。

又成就多功德。隨順世間門。集諸行故。如經。若念力堅強。雖入五欲賊中。不為所害故。念力強故。勇健無畏。入陣相似法故。如經。譬如著鎧入陣。則無所畏。是名不忘念故。

四中隨順世間門。謂入塵化物。遊涉塵事也。有本作出世間門者。非。集諸行者。謂習行方便。饒益眾生也。由有念力。故入五欲不為害也。念力下釋喻。鎧即是甲。喻念力也。陣謂軍陣。喻五欲也。